

Switch TV e programa di Switch Foundation cu programa nobo tocante violencia domestico



ORANJESTAD (AAN): Riba dia 10 di October pa 9:10pm na TeleAruba (despues di e sorteo di Lotto pa Deporte), Switch TV lo presenta un programa mas di calidad pa crea conciencia den nos sociedad. E biaha aki e topico ta violencia domestico.

Den e programa aki lo splica den detaye, kico precies ta worde considera violencia domestico, ki sorto di violencia domestico tin y su consecuencianan. Manera ta worde splica den e programa pa medio di testimonio y entrevistanan cu specialistanan, cualkier hende por bira victima di e fenomeno negativo aki cu dia pa dia ta bira mas comun den nos comunidad.

E violencia domestico no ta solamente contra di hende muher, pero tambe tin maltrato

di mucha y contra hende grandi.

E violencia domestico mas visible ta e violencia fisico pero tambe tin un violencia cu ta menos visibel y ta esun emocional caminda ta abusa di otro pa medio di palabra.

Como consecuencia di e violencia domestico, Aruba ta conoce hopi divorcio y drop-outs, entre otro.

Switch Foundation ta invita pueblo di nos isla en general, pa mira e programa aki pa asina siña identifica lihe e sintomanan di e problematica aki y con por haya ayudo pa yega na solucionan sin trauma.

Den e programa lo trece pa'dilanti nomber di instantan cu por yuda bo, manera Fundacion pa Hende Muher den Dificultad. Tambe tin 'slachtofferhulp' cu ta yuda hendenan cu ta bira victima.

Sintonisa e programa educativo aki di Switch Foundation na TeleAruba y uni cu nos pa asina dia pa bira un sociedad mas sano, stabil y educa.

E programa lo worde ripiti (esaki lo worde anuncia) y lo ta permanente riba www.switch.aw y www.facebook.com/switcharuba

